



Des söllt ejeder emol orndlich laasn!

**Wenn de genuch ze Assn in Kiehlschrank hast
Klamottn zen aaziehe,
e Dach übern Kopp un in Platz zen Schlofn,
dann bist de reicher als dreiviertl aller Leit.**

**Wenn de Gald in deiner Tasch hast
un hiegieh kast, wuhie de willst,
noocherts geherste zu de reichstn
achtzn Prozent of dor Walt.**



**Wenn de heit ieberlabst
mit meh Gesundhaat als krank,
dann kaste diech glicklicher schätz
als Millione vu Menschn,
die in dieser Woch starbn wern.**

**Wenn de den Text hier laasn un vorstieh kast,
dann haste meh Glück als die drei Milliardn,
die weder laasn noch schreiben kenne.**

Das kann
ich lesen

**Im Laabn giehts net do drim,
siech immer ze beschwern
oder siech Sorgn ze machen.
Is gieht aafach do drim,
eweng glicklich un dankbar ze sei!**



#ERFOLGSMENSCH

Blattl-Fotos: M. Schürer, R. Tittel, G. Schmidt,, Internet freie clips, EHV- Archiv




Erzgebirgischer Heimatverein
Eibenstock e.V.
Otto-Findeisen-Str. 14
08309 Eibenstock

Tel. 037752 / 2666 oder 2141
Internet:
www.heimatverein-eibenstock.de

Bankverbindung:
Erzgebirgssparkasse
IBAN: DE90 8705 4000 3892 2072 58
BIC: WELADED1STB

Unner Blattl



Nummer
190

Mitteilungsblatt des
Erzgebirgischen Heimatvereines
Eibenstock e.V.

Januar
2021



Des sei schiene weiße Baame, is e Winter, wa ?

Ihr kennt doch alle unnere Siedlung, do wu unnere Tittels wuhne?

Im vorign Harbst hot mirch dor Tittel-Rain aagerufn un saat, des ar su viel Äppeln hätt un ob iech welche gebrauchn kennt. Nu freilich saat iech, do komme mor gern vorbei! Die ham fei gut geschmeckt, des merkn mor uns schu mol fors nächste Gahr. Inzwischn sei die schu lang aufgebraucht, un sei aa ze Applmus un Applkuchn genumme wurn



Do hintn is de Soser Stroß

Wu mir bei ne warn, sei mir of de Siedlung ze sprachn kumme, un iech wollt emol wissen, wann un wie die gebaut wurn is. Do drauf hie hot er eweng recherchiert – also in altn Unnerlogn nooch geguckt – un diese Bilder gefundn. Wie siech des ganze entwickelt hott, konnt`r nâr stickweis rauskrign. Nâr suviel dodorzu: Dar Bau hot

von 1934 bis 1935 stattgefunden. Irchndwie ham siech do welche zamgefundn, die gern e eichenes Haisel ham wolltn. Es solln ganz aafache Leit gewaasn sei, aa Arbisluse dorbei, also allis welche, die net gerod racht viel Gald zen Labn hattn. Is war ugefahr ne Summe von 3.500 Mark von jedn Dorbauer ze berappn. Öb do de Stadt, is Land Sachs n oder de Bankn geholfn ham, kunnt mer bis itze net in Darfahring bringe. Wie aa immer – in den Bild hier dornabn is im Vordergrund de Fuchs, Marga als klaanes Maadl ze sah. Inzwischn is die aa als letzte gestorbn, die domols mit eiziehn kunnt.



Wir gratulieren unseren Heimatfreunden

Klaus Reifschneider	am 13.02.	zum 72. Geburtstag
Uersula Baumann	am 18.02.	zum 67. Geburtstag
Frank Weiß	am 19.02.	zum 60. Geburtstag
Barbara Bochmann	am 20.02.	zum 63. Geburtstag



*Namm dir fei Zeit, bleib immer e mol stieh,
tu diech besinne –
kimmstaa dortn hie, wu de hiewillst,
denn mit Eil un Hast
hat mannicher in senn Labn
oft is Schennste verpasst!*

- Anton Günther -

In dor erschtn Januarwoch ham mir gemäß dor Hygenie-Vorgabn – also aaner noochn annern - de Revision - mit Galdzählerei, Kontobewechung un Ieberwachung vun Vereinstrans-aktsjone dorledicht.

Nâr – de Vürstandssitzunge ieber su e moderns Hoom-Offiss ham mir bis itze net zestand gebracht – do fahlts aafach an dor Technik, un des Bediene wâr ja aa net jedermanns Sach !

Dor Jahresplan for 2021 muss also noch eweng wartn, is hast ohwartn, wie siech dor Virus samt dor Obrichkeit entscheidn tut, wanns wider lus gieh ka. Aber, net vorzogn – suball mir ewos wissen, kimmts garantiert zeitich genuch nein Blatt`l un in unnere Innernetseit.

Wie wird`s dä wettergieh 2021 ?

Wenn mer bedenkt, des mir insgesamt 6 Hutznobnde 2019 ausfalln lessn mußtn un itze genne aa noch emol mindestns 3 vorlorn, do müssn mir uns ja emol 9 Tog hinnerenanner traffn, im des wieder aufzehuln. Aber ham mir dä do su viel zu dorzähl'n? Is gibt ja immer wieder ewos ze bekaschp'n, aber gelei uhne Pause 9 mol? Also klaane Filme hob iech aufgespart, do loht siech schu mol e Vidjo-Obnd mit schiene Biddle un Musik, zen Beispiel vun unnern Auersberg-Traffn, dor Kramserfahrt oder vun Iberraschungsgast im Q-Stall. Bis dohie werds aber bestimmt noch eweng dauern, den Virus ham mor bei weitm noch net im Griff. Trozdam muss iech sogn, de Menschheit is aber salberscht dra Schuld, des des Theater su lang dauert. Wenn sölche „Kreiz- un Quardenker“ su blind sei un des allis aafach ignoriern, do kaa nischt warn! Die steckn siech dann gegenseitich un annere noch mit den Virus aa, su des des nie aufhört! Eigentlich müsstn die allezam mol die vieln Schichtn in de ieberbelechtn Kranknhaiser ieberrahme! Un dann noch die Impfgeechner! De Impfunge ham mei Tog schu in frühern Zeitn geholfn, zen Beispiel de Kinnerlähmung Aafang dor 60er Gagr ze ieberstieh. Des kam ja gut rieber in dar letztn Fernsehserie „Charité“ ! Un wenn de Leit ins Ausland fliegn, nooch Amerika usw., do wern geleih e paar Impfunge fällich zen Vürzeign, sinst derfst de glei gar net ins Land eiraasn. Do lessn se siech alle drauf ei, när im dortn hiezekumme. Su sei de Mensch, falsch vorstandene Freihaat!



Iech hob mol in dr Schul gelernt, Freihaat is de Eisicht in de Nutwendichkeit! Also Freihaat allaane reicht net, allis muss stimme: jeder muss sei Aarbit machen, dodormit im gemeinsame Mitenanner allis im rachtn Lot is. Jeder for siech allaane ka net bestieh, när mitananner un dor richtchen Eistelling giehts Labn voran. Un de Gesundhaat is dodorbei besondersch wichtich !

Bleibt allezam schie gesund – des wünscht eich alln eier Schmidt! !

Dor Bauplan war su aagelecht, des vun untn rachts 5 Dopplhaiser gebaut wurn sei un ubn dann links aa noch emol fünfe, immer genau de gleiche Bauweis. Ausgeschacht un lusgebaut ham allezam mitenanner. Kaaner hot bis dohie gewußt, in welches Haisl mol eigezugn werd, des is erscht nooch dor Fertichstellung vorttaalt wurn!



Des is a Ding, des hätt iech net gedacht, des is dozemol schu suwos als Mitenanner gob! Uni s Maadl, de Marga, war ne geborene Ullmann, vom Gasmaa de Tochter. Die ham dann geleih im erschtn Haus untn rachts gewohnt. Un in dr annern Doppelhälf is dann in Rainer sei Op eigezugn, dor Tittel, Max. Un wenn ihr eich

dorinnert, hot mir de Baumgarten, Annemarie ne Sach vun dor Hahn-Familie dorzählt – die Sach mit ne Reiwash-Kuchn – die ham aa do in dare Reih gewohnt. Heitzetog is unner Siedlung e rachts Schmuckstickl vun Eimstock, zwar eweng weit ab, aber des wär ja gerod schie!



*Su schí eis unner Arzgebirgswinter 20 / 21, blus diesmol uhne Urlauber,
när e paar eihaamische dimpln ze Fuß oder mit de Schneeschuh eweng imhaar*



Rundrim im Eimstock – vun Carlsfald, ieber Sose un Auerschbarg

Aa wenn mir tichtich ausgebramst warn in diesn Winter – is gieht ims Prinzip: lieber gesund un aanzln durch unnere Landschaft spaziern un schiene Bilder sah, als (hoffntlich net) krank ze sei un des Ganze ganz un gar vopassn...

Also: durchhaltn, aa wenns schwar fällt, einst werds wieder besser!

De meestn Bildle sei vu dor Auerschbarg - Anja Gauggel, die annern vu dor Antina un halt vu de Schmidtn.